

光緒山西通志

忠烈錄上

錄三之一

山西通志卷百三十六

賜進士出身頭品頂戴兵部侍郎兼都察院右副都御史巡撫山西提督軍務臣張煦奉
旨監修

國家優恤死事之臣世職下逮末僚血祀徧及民庶典禮選
隆恩明誼美一命之士皆知崇名教凜志節以偷生爲恥取
義爲榮蓋自我

世祖章皇帝定鼎之初軫念勝國遺忠肇舉

曠典於甲申殉難諸人皆

賜謚致祭

高宗純皇帝復

特沛殊恩凡明季効命封疆殞身寇難與夫力抗大軍甘膺
顯戮又推及於建文遜國諸臣莫不追予褒揚特謚專祀遍

及海宇而晉人之得與易名之典者至六十人盛矣哉自古
表忠前代未有大公至正若斯之浩蕩者也昔梁元帝撰忠
臣傳以寄託諫諍執法死節標目而史傳忠義惟取死節舊
志則統於人物無復區別今獨準史例採輯自漢迄今臨難
捐軀者爲忠烈一錄於

朝廷闡幽表微風勵臣節之義或有合也至於名卿大臣致
身報國各有本末已備見鄉賢此不更述

歷代

漢至明

令狐邁太原人秦太原守五馬亭侯範十四世孫爲建威將
軍與翟義起兵討王莽敗死三子伯友文公稱皆奔燉煌

右漢一人

周倉河東大陽人從關公以忠勇見親公遇害倉死之

舊志倉平陸人有武勇拔筋虬髯儀容甚偉初爲張寶將自恨事非其主比遇關公于臥牛山翻然曰匹夫失所依今遇將軍如披雲霧而見青天願步隨雖千里不辭也遂相從當樊城之役漢水暴溢魏將龐德乘小舟欲還營倉深知水性驅大筏而來衝翻小舟生擒德上筏其驍健如此後守麥城忠勇益厲比聞關公遇害遂死之

謹案將軍姓名不見正史或據三國志魯肅傳肅往益陽邀關相見各駐兵百步上但將軍單刀赴會肅因言國家區區以土地借卿家者以卿家兵敗遠來無以爲資故也今已得益州旣無奉還之意但求三郡又不從命語未竟坐有一人曰夫土地者惟德所

在耳何常之有肅厲色呵之甚切關操刀起曰此自
國家事此人何知目使之去云所言此人蓋卽倉也
演義實本以立說又元魯貞作關廟碑有乘赤兔兮
從周倉語則其來已久不得以史佚其名遽斷爲無
稽也然如舊志所稱究當存疑且直書爲平陸人亦
未合姑附著之

右蜀漢一人

姬澹字世雅代郡人爲單于猗屯將猗屯之赴晉難也表列
其勳拜將軍以勇績遷至信義將軍樓煩侯猗屯弟代王猗
盧立與衛雄並見委任爲左右輔相六修之亂澹與雄率三
萬人歸劉琨琨大喜馳至平城撫納之屬石勒攻樂平琨以
新得澹衆欲因其銳以滅石勒澹諫曰亂民飢疲未可使用

宜休息觀釁而動現不從使潛率眾討勒琨屯廣牧爲聲援
勒率輕騎與戰潛大敗率騎千餘奔代郡勒遣孔萇追之桑
乾攻代郡潛死之

右晉一人

傅虎爲劉聰討虜將軍晉陽之戰虎以參軍從中山王曜與
代公猗盧子六修戰於汾東曜兵敗墜馬身中七創幾爲六
修所獲虎以馬授曜不受曰當今危亡之際人各思免卿當
乘以自濟吾創已甚重自分死此虎泣曰虎小人蒙大王識
拔至此常思效命今其時矣且漢室始基大難未弭天下可
無虎何可一日無大王也乃扶曜上馬驅令渡汾自還戰死
聰甚哀之追贈幽州刺史

右前趙一人

宋洽介休人爲慕容垂尙書魏太祖園中山洽專守北園當洽所統魏軍士多傷城陷被殺子順訓並下腐刑

右後燕一人

裴炯字休光聞喜人父颺自齊入魏爲南司刺史詔命未至被害炯壯果有謀略明帝初除鎮遠將軍進爵高城侯出爲東郡太守爲城人所害贈散騎常侍青州刺史謚簡

王元遜祁人從父應援守潁川城陷遂罹害

右後魏二人

宇文連武川人幼而謹厚臨敵果毅隨父肱遇定州軍於唐河俱戰歿保定初追贈太傅柱國大將軍大司徒襲杞國公諡烈以章武公導子亮嗣

宇文冑武川人父什肥事母孝文帝入關不能離母遂留晉

陽爲齊神武所害保定初追贈大將軍小冢宰襄邵國公諡景胄少孤有幹略齊以其幼下蠶室天和中歸襄邵國公隋文帝輔政胄爲榮州刺史舉兵應尉遲迥爲楊素所殺國除

右北周二八

慕容赤土隋初爲金吾將軍因災異上言文帝剖腹出心帝憫其忠爲立廟今屯留有將軍祠

獨孤感雲中人上柱國楷弟性剛烈有膽氣以左右從晉王累遷車騎將軍大業初漸見親待累轉右屯衛將軍江都之變不及被甲與左右十餘人逆拒亂兵爲所殺越王侗贈光祿大夫紀國公諡曰武節從子開遠大業中爲千牛與盛力戰閣下爲賊所執賊義而舍之

右隋二人

王海賓太原祁人徙華州鄭爲太子右衛率豐安軍使開元二年吐蕃寇隴右隴右防禦使薛訥以海賓爲先鋒戰武階追北自壕口殺寇康進戰長城堡諸將竄其功按兵顧望海賓戰死大軍乘之斬賊萬七千級獲馬七萬牛羊四十萬上憐其忠贈左金吾大將軍

薛愿河東汾陰人父紹禮部郎中兄崇一尙惠宣女宜君縣主女弟爲廢東宮瑛妃南陽節度使魯吳奏爲潁川太守本郡防禦使時陳留滎陽汝南等郡陷賊方圍南陽潁川當往來道愿與防禦副使龐堅同力固守城中儲蓄無素兵力單寡自至德元年正月至十一月賊晝夜攻之不息距城百里廬舍林墓伐毀殆盡而外救不至賊將阿史那承慶悉以銳卒併攻爲木驢木鷲雲梯衝柵四面雲合鼓譟如雷矢石如

雨力攻十餘日守備皆竭賊夜半乘梯入愿與堅俱被執送東都將支解之或說祿山二人義士屠之不祥乃繫洛水濱屬苦寒一夕凍死

王行敏井州樂平人隋末爲盜長高祖興來降拜潞州刺史遷屯衛將軍劉武周入井州寇上黨取長子壺關或言刺史郭子武懦上遣行敏馳往旣至與子武不叶賊圍急儲侍空乏衆恟懼會有告子武潛謀遂斬之賊尋去又敗竇建德兵於武陟武德四年徇燕趙與劉黑闥戰歷亭破之旣而釋甲不設備爲黑闥所掩縛致麾下終不屈賊遂斬之且死西向跪曰臣之忠惟陛下知之上聞而悼惜

姚闓陝州平陸人崇族孫父弁開元初處州刺史闓性豪蕩好飲謹善絲竹天寶末厯壽安尉遷城父令與張巡親善以

守睢陽功至德二年春加東平太守與巡同死難贈潞州大都督官一子

右唐四人

張源德晉人從李罕之入梁自金吾衛將軍爲蔡州刺史梁貞明三年分魏相等六州爲兩鎮遣劉鄩將兵萬人屯於衛以虞變魏軍追節度使賀德倫以魏博降晉時源德爲鄩守貝州晉王入衛先襲破德州乃以兵五千攻貝源德堅守不下晉軍壅而圍之已而劉鄩大敗於故元城南走黎陽晉軍攻破洺州而衛邢磁相滄或降或棄城走當此時晉已先下全燕自河以北山以東四面千里六鎮數十州之地皆歸晉獨貝一州圍之踰年不可下源德守旣堅而貝人聞晉已盡有河北城中食且盡乃勸源德出降源德不從遂見殺

右五代梁一人

李肇上黨人仕唐歷軍校至檢校司徒從討王都於定州不利力戰死之子孫入宋爲勳臣貴戚

高從慶并州壽陽人以裨將戍天井關與梁軍戰死子防仕宋爲樞密直學士

右後唐一人

盧贊事睿宗爲宣徽使周臣李筠之降睿宗使贊監其軍筠內頗不平謀事多與贊忤睿宗命衛融中解之而卒未能降心相從也無何宋將石守信大破筠軍贊遂以身殉左右莫不哀之

右北漢一人

宇文光黎城人博極羣書尤精於春秋左傳曰不讀此無以

斷大事豈獨取其富而黜哉當宋中葉邪正迭進而光審時
嘉遜絕意功名靖康中金兵南下猶讀書山谷中見執不屈
而死女亦死

侯仁寶汾州平遙人中書令益子趙普妹壻也蔭遷太子中
允盧多遜與普有隙普罷相卽以仁寶知邕州州之右江生
毒藥樹宣化縣人常採貨之仁寶以聞詔盡伐去九年不代
太平興國中陳取交州策太宗令馳驛召歸多遜違奏曰若
召仁寶其謀必泄蠻夷修備未易取也不如授仁寶飛輓之
任且經度之別遣偏將長驅而往勢必萬全遂以仁寶爲交
州水陸計度轉運使前軍發遇賊鋒甚盛援兵不繼遇害江
中上甚悼惜特贈工部侍郎錄其子延齡延世並爲齋卽延
齡至殿中丞延世至太子中舍

李守恩雲州雲中人忠武節度使漢超子也少驍果善戰有父風初補齊州牙職開寶二年征太原從漢超軍中遼遣兵援河東至定州西嘉山將入土門守恩領牙兵數千騎戰敗之斬首三千級獲戰馬器械甚衆擒首領二十七人隨漢超見行在賜戎服金帶器幣緡錢太祖曰此稚子能若是他日將帥才也漢超卒擢驍猛軍校累官隴州刺史知靈州與轉運使陳緯部芻糧過瀚海爲賊所邀守恩及子廣文助教象之隴州衙內指揮使望之弟寄班守忠皆沒真宗震悼特贈洪州觀察使次子祐之順之用之潤之慶之成之藏之

孫谷朔甯人孫益知府事察其可用奏爲祿屬待之異於常僚益出師屬以後事益服敵騎來攻衆議迎之谷爭弗得嘆曰吾身已許國又不忍負孫公之託諸人不見容是吾死所

也或舉刃脅之無惜容遂見殺

以上各府屬

楊宗閔代州崞縣人爲永興軍路總管與唐重同守永興金人陷城迎戰死之後諡忠介賜廟曰顯忠子震別有傳

眞寶代州人五臺山僧正靖康兵起率其徒習武事於山中欽宗召對便殿眷資隆縹緲還山金兵大至晝夜拒之力不敵寺舍盡焚帥下令生致寶寶至抗詞不撓帥不忍殺使郡守劉駒誘勸百方終不顧且曰吾法中有口同罪吾旣許宋皇帝以死豈可二吾言帥遂殺之寶怡然就戮

邵雲河中龍門人建炎初從陝州石壕尉李彥仙守陝金人破城雲被執金將婁宿欲命以千戶長雲肆晉不屈釘之木架上置解州東門外惡少撫其背涅文曰可鞘吾佩刀雲怒偃架仆之後五日磔解至抉眼摘肝晉不絕喉斷乃已初行

刑將剗刀雲叱之失刃而斃其忠勇如此

呂圓登夏縣人嘗爲僧後以良家子應募捍隄灑李彥仙保
三背圓登歸之功最多爲愛將城垂破以兵來援身重創持
彥仙泣曰圍久不知公安否今得見公且死無恨方臥聞城
陷遽起戰死

司馬夢求夏縣人僑敘州光之後母程歸及門夫死誓不他
適旌曰節婦夢求其族子也取以爲後景定三年舉進士咸
淳末調江陵沙市監沙市恃水爲防德祐元年湖水忽涸北
兵橫遏中道都統程文亮制置使高達降夢求朝服望闕再
拜自經死

以上各州屬

右宋九人

又三人附見

趙益太原人讀書肄業元兵入鳩合土豪保聚山峽屢戰有

功晉陽公郭文振署壽陽令駐兵榆次重原寨遂率眾收復
太原夜登城斬賊甚眾獲老幼二萬餘口馬仗不可計升太
原治中復擢同知府事兼招撫使元光元年八月元兵攻城
益急知不可支乃焚府庫殺妻子沈符印于井遂自殺贈銀
青榮祿大夫河東北路宣撫使仍求其子孫

劉海興州人舉進士第一人仕至河南府尹死于國難子孫
遂家河南焉

楊貞吉州人父椿嘗爲獻州刺史貞擢明昌進士第仕至河
東南路招撫使隰吉便宜經略使築牛心寨以禦元圍急命
其子克義克敬增伍禮厚俱死之又命妻孟氏自經女卽禮
厚妻墜崖死貞乃南望再拜焚廬赴河死後尸橫水上門人
張安石收葬焉

段元亨河中人提孤軍守城或誘其降不從城陷緬西南墜
下死於河兄大亨爲領軍都元帥亦死於難祀鄉賢

南仲蒲州人有孝行爲鄉里所推元兵至合力守禦先士卒
死之

張國綱高平人外柔內剛事不避難爲濮州刺史死於王事
張升字進之大同人戶工部令史出身爲漁陽簿遷絳州錄
事天興二年十一月河解元帥趙偉自金雞堡渡河入陝州
劫殺行省阿不罕奴十刺升謂知識者曰我本小人受國家
官祿今日國家遭不幸我不能從反賊言訖赴水死岸上數
百人皆墜惜之

以上各府屬

移刺阿里合遼州人任霍州刺史興定中元兵至戰敗與寶
昌軍節度使孔祖湯俱被執不跪向闕而立元人叢矢射殺

之祀霍州名宦

閻衍沁州人歿於王事以義稱其子忠避兵居高唐州善屬文仕元累官翰林學士承旨

耿升平定人天性好義與妻避兵被執不忍禍及鄉眾遂皆死之州帥聶珪旌其節具禮葬焉子守直登進士金亡隱居三教里終身不出

胡定哥管州人平陽公天祚子也以父功錄爲奉職元光初天祚兵潰降元定哥聞之自經死贈信武將軍睢州同知

喬天翼五臺人金末爲合河令元兵至城陷不屈死

段大亨芮城人干木之裔早以義氣自豪修幹多力精騎射喜兵法飲酒至石不亂貞祐末爲領軍元帥佩虎符正大七年以勞進河南諸路軍兵都元帥錫兩虎符壁竹林堡附者

日眾哀宗未引其眾七百人入棗鄉谷戰死其弟元亨提孤軍守河中元兵誘降不從力竭城陷就其城西南堞下策馬渡河麾下附馬尾以涉者眾卒溺死其子宜僧亦戰死元平定後子好謙求其尸與夫人史氏歸葬先塋

以上各州屬

右金十三人

又六人附見

喬彞晉甯人性高介爲詩文有法自號芸齋至正中賊陷晉甯城中死者十二三彞整衣冠聚妻子家有大井彞令妻子輩循次投井中而已隨赴之賊平贈臨汾尹諡純潔

王佐字元輔晉甯人嘗舉進士從父居上都教授里巷不與時俯仰會賊至爲所獲欲降之佐傲岸自如詎賊不報見書

舊志孝義云金末進士人物則列入元案尙在至正賊陷上都時

賀方字伯京晉甯人以文學名爲治書侍御史明兵下集慶

死之

靳頡曲沃人任征西大將軍不避艱險沒于陣獲其尸而失其首錫銀首連葬

任志潞州人穆呼哩略地至潞志首迎附充元帥收輯山寨每與金兵戰輒勝金擒其長子如山招之曰降則子生否則死志曰我爲大朝帥豈愛一子親射其子殪之穆呼哩嘗召志議事道經武安其縣已反志死之子存襲元帥金將武仙攻潞州存以戰死詔有司廩給其妻孥仍賜第居之世爲潞

州長官

以上各府屬

韓亨甫絳州人由中書省掾授監察御史後調東平路總管至正間毛貴作亂守城死節贈陝西行中書參議

邢飛翰霍州人性剛果以爲爲內御史伯顏專政飛翰面質

其非參議佛家驢姦邪復廷劾之後以兩淮鹽運同知致仕
元末兵亂被執不屈死追封工部尚書諡忠毅

賀方霍州人幼聰慧日誦數千言人呼小學士隨父宦遊江
南由國子生仕至翰林應奉待制升學士終江南路治書侍
御史城陷死之

王得貞霍州人進士至大間懷慶路總管能詩善草書至正
間爲掃地王賊兵所執不屈死贈河東宣慰司使以上各州屬

右元九人又一八附見

江洪字朝宗其先合肥人祖浩爲太原左衛指揮僉事子孫
世襲因家焉洪少以才勇知名善騎射能任人與士卒同甘
苦宣德末選總京營左翼升署都指揮僉事仍守山西英宗
十四年北兵犯邊上率六師親征失利洪奮勇護乘輿與其

弟子四人並死之

陳經太原左衛人正德間任甯武守備敵大舉八關經奮勇戰死敕贈昭勇將軍立祠祀之

韓唐太谷人性忠鯁有膽略正德間由太學生授萊蕪縣主簿流賊楊虎驅眾數千人來攻城聲勢洶湧唐意氣慷慨率子子思督鄉兵拒戰殺賊數十人力盡被害事聞贈萊蕪縣知縣錄子思國子生後官鴻臚寺序班

王佑祁縣人性端方負經世學正德中以貢授廣昌知縣苗寇亂自福建大帽山抵縣境恣焚掠佑列木爲柵驅市人激以忠義相與效死寇破柵入猶橫刀巷戰殺數十人被執不屈遂遇害

王鼎岢嵐州人正德中以貢授永城縣知縣負氣好義受事

時流賊趙燧等已入豫中知不免飭兵儲餉爲死守計城東白洋河孔道也救舟子往來者勿渡數日有持牒者驅徒十許人皆桎梏曰是所獲鄉導賊來寄永城獄中者甫渡卽脫桎梏殺舟子權二萬人至城下鼎偕主簿曲啟訓導王景賢分城以守戒曰失守者斬鼎故善射連仆十餘人賊不敢近日暮曲啟遁賊破城入鼎聞變急下與賊遇持長戟力戰久之被執至死罵不絕口事聞贈光祿寺丞錄子爲國子生董綸字葵之太谷人判官文博子嘉靖間由太學生授歸德府檢校賊師尙詔作亂太守廉綸材命署巡捕事獲賊黨數人將誅之爲當事所沮不果已而夜斫門招外賊入綸奮不顧手執鋤刀率姪董魁並一僮戰於街巷妻賈亦執槍以從被執與妻姪四人相對就死事聞贈歸德府同知錄子良臣

爲國子監生都御史呂坤御史宋纁胥有文祭之

畢文字載道先世和州人以軍功授太原衛指揮因家焉文倣儻有奇氣初署甯武所再署八角堡守備繕城訓士尋以陝西都司罷歸撫軍王知其材辟掌中軍事後復起陝西都司升雁門遊擊將軍禦敵東峪口俘馘有差已復誘擊蕎麥川破之爲仇者構陷下獄適標兵變焚劫公府以巨木撞獄門選拜文前願奉之舉大事文怒甚罵曰若等受國恩不能効犬馬報乃欲爲滅族計耶賊進以刃逼之文益罵不休遂遇害後撫軍萬立祠北門內檄有司春秋祀之

王元雅太原衛人萬曆甲辰進士歷官都御史巡撫遵化崇禎二年

大兵至城陷冠帶縊死於公署全家並殉二年正月巡撫方

大任言元雅有失城罪而一死節概凜然足以蓋愆樞輔孫承宗請卹殉難諸臣亦首元雅而以大吏故贈卹不及

國朝賜謚節愍

武維周太谷人天啓甲子舉人知直隸大城縣政簡刑清後以守城中流矢死贈光祿寺少卿給諫命祔祀京都三忠祠中

國朝賜謚節愍

張鳳奇陽曲人舉於鄉崇禎初爲永平知府三年正月殉城闕門盡死贈光祿卿祭葬陰一子

國朝賜謚烈愍

陳三接文水人舉崇禎六年鄉試知河間縣歲饑人相食三接至雨卽降有疑獄數年不決立判之妻武氏賢三接見封

疆多故遣之歸答曰夫死忠妻死節分也十五年閏十一月
殉難於巷武氏亦從之贈僉事

國朝賜謚烈愍

朱廷鄣代府宗室也崇禎中爲鞏昌府通判署秦州事有廉
直聲十六年冬賊陷城帥使跪叱曰我宗姓頭可斷膝不
可屈賊欲活之大呼曰今日惟求一死坐自若乃見殺

朱慎鑊晉府宗室攝靈邱郡王府事賊陷太原冠帶祀家廟
驛家人入廟中焚之已亦投火死

國朝賜謚烈愍

任萬民陽曲人崇禎間諸生常著救時八議守城十說撫按
薦授城武知縣任三載城破死之

國朝賜謚節愍

張景維陽曲人以舉人授光山知縣未之任賊陷太原被執不屈死

國朝賜謚節愍

孫祿陽曲人以貢選蒲州學正城陷投井死其以諸生殉節者彭鯤以父參將振雲難蔭官百戶聞賊至拔刀以待格殺數人被害魏選奇妻爲賊追奮拔賊刀殺妻被害田大治當城陷衆潰持刀獨留賊問何人曰吾諸生也專砍汝頭賊殺之又陳功者被執不屈死

武象乾太谷諸生固原州同知國清子國清署鎮原縣事爲闖賊所執累置死地志益堅象乾承庭訓又時時教其三子甲中闖賊至象乾與城守之役捍禦盡力城破將驅衆巷戰衆潰因歸伏臥室中冀乘間殺賊頃之一賊入手刃之連斃

數人餘皆悖莫敢動亟呼其黨揭屋以入象乾被擒與三子俱死人稱三世忠義云

郭民翰員觀光並太谷諸生杜光輝故家子也城陷賊脅之降不屈皆赴井死李元芳爲賊執駕不絕口與妻員氏同遇害又趙譔亦以罵賊爲所殺

吳用極字心銘清源人垂髫時有志陽明之學已隨父任元城問業趙高邑南星學益進及父任徽州州多礦賊出奇計破之文名日起年十九舉萬曆戊午鄉試時邊警屢至嘗拊髀嘆思爲國家效力崇禎中酉間流寇猖獗用極居南關中曰夕經營爲固圉計已而賊夜至用極仗劍登陴血戰死關人感其忠捍禦益力卒獲保全事聞詔以義烈旌之

江明陽曲人爲北城鄉約闔閭太原率夫禦賊城陷不去被

殺時有生員英維藩督守陴者賊至被殺

張治經齊履俱監生張治度趙芳任三讓桑葑祁州俊李聯
捷王國昌李塾侯之翰齊人道寇獻瑜寇獻球寇永澆褚廷
文李塘李幹智大用褚延寬李登龍寇省身及弟發身王瑄
王建元孫承志董萬有李自登程雲步張辨齊文輝王度宏
翟漢傑張鳳翔張運隆郝龍正俱生員侯祥副榜郝應麒王
輔國俱武舉闖賊陷榆次城守城死義

以上太原府

韓永浮山人建文時爲戶科給事中狀貌魁梧音吐洪亮每
慷慨論兵事金川門不守召欲官之不屈死

國朝賜謚節愍

王七曲沃人建文時燕兵至金川門上章論君臣大義略曰
以臣伏君可謂忠乎亂祖宗傳子之制可謂孝乎欺其孤而

上正統元年二月二十二日 六月
奪其位可謂勇乎纒纒數百言成祖嘉其直官之不屈唾罵
益甚竟斷舌被籍云

國朝賜諡烈愍

安惟學字行之臨汾人成化甲辰進士除行人歷工部郎中
出知平涼府遷四川參政仍掌平涼府事擢本省布政使器
度宏遠才識敏給後晉副都御史巡撫甯夏遇安化王寘鐸
作亂惟學方與都指揮楊忠計事寘鐸黨何錦猝至殺於座
上

亢孟禴字似何臨汾人萬曆丁酉舉人授洋縣知縣性和易
喜造土撫窮開渠堰溉田瑞藩之國王府諸人多橫肆據法
裁正省民間金錢無算擢河南府知府招徠流民剿蕪土寇
壬午鬪賊至率同官竭力守禦城破死之事聞贈太僕寺卿

國朝賜謚節愍

上官蓋字忠赤曲沃人萬厯乙卯舉於鄉崇禎中知順義縣廉直有聲在官三年薦章十餘上九年七月殉城贈卹如制國朝賜謚節愍

許永禧曲沃人萬厯戊午舉人崇禎十四年官上蔡知縣多惠政性耿介頌笑無所假十五年春李自成遣騎抵城脅降永禧卽督吏民城守歎曰賊勢披猖彈丸邑豈能固吾一死盡職而已衆皆泣明日賊大至守者驚潰永禧具袍笏北面再拜據案秉燭端坐賊入遂自刎

國朝賜謚節愍

鄧永清平陽人由歲貢知沙河縣崇禎間山盜入寇攻城急晝夜相拒力不能支城陷被執賊露刀逼永清冠帶跪見永

清曰吾堂堂天子命吏恨不磔汝等萬段此膝豈爲汝輩屈哉屬不絕口遂被害全家殉難至今子孫無傳

國朝賜謚節愍

閩生斗字文瀾汾西人崇禎中由歲貢歷保安知州七年七月殉城贈太僕少卿

國朝賜謚節愍

史可觀翼城人太常少卿學遷子官文華殿中書舍人加鴻臚少卿城陷自縊死

國朝賜謚節愍

樊進學岳陽人加銜守備賊盤據白素材等處進學領兵壯衝賊營連戰數合死子光裕挺身救父衆寡不敵亦同殉段光彩周三光俱岳陽千總賊屯聚翼氏山中領鄉勇進剿

殲於賊

王宗璽岳陽人以生員改守備賊逼近和川堡璽率鄉勇迎戰連殺二賊死

李茂彩岳陽人賊至辛莊彩登屋揭瓦擊傷二賊賊攢射之身中數矢始顛賊愛其驍勇欲掠同行彩罵口不絕死

邢一科賈良薦俱太平縣民授職千總賊往來故縣里二人督鄉勇頻截賊尾頗有奪獲一日賊設計誘鄉民入山二人當前戰令眾各奔逃遂力戰死唐光先者不詳其籍以都司駐太平崇禎五年流寇擾境光先率守備支彥龍楊成功等五人與賊戰於侯村死之鄉人收葬樹碑於墓

張曹語太平人諸生流賊犯境及同學張思讓率眾禦之兵

潰力戰死院司申請得祠祀

以上平陽府

黃連字續之萬泉人正德中官湖州府檢校升大興縣主簿
流寇犯境率民兵及家衆禦之弩殪數人賊攻益急死於陣
事聞贈大興知縣遣官諭祭祀忠義祠

李軌萬泉人有孝行親歿廬墓三年正德中官江西南康熙
磨流寇陷城守臣皆遁獨與妻暢子某死之

楊宗業蒲州人武舉官都督僉事浙江總兵萬厯間殉難贈
都督同知

馮守禮猗氏人舉於鄉縣令有疑獄語訴者得馮孝廉一刺
獄卽解其人懷金以告拒不聽選平定州學正諸生兄弟爭
產相訐餽以金嚴却之開示以友悌皆解去由莒州學正遷
知萊蕪縣崇禎十五年與二子摠奇拱奇並殉難

國朝賜謚節愍

韓承宣蒲州人大學士彙之孫也舉進士崇禎中知歷城縣十二年正月與妻妾同死節獲贈卹

國朝賜謚節愍

郭俊義榮河人拔貢生知涼州盜起以身殉難

韓允勳字振廷蒲州人嗣職爲副千戶太平寇警戰還殿後賊衆蜂至矢盡被創死贈指揮同知

王震仲猗氏人魁梧有膽略由武會副榜除許莊堡操守防禦有功累遷正定府中營遊擊臨賈邢西士寇猖獗單騎往諭降者數千人奉檄援易州捲甲疾趨以全城功進本營副總兵建牙河間保督楊文岳帷幄機密悉咨籌畫叛將任國奇率衆四千橫踞泊頭鎮計欲往勦而標兵調赴開封禦闕寇乃募步卒三百爲後勁率親丁四十騎夜擣賊營賊錯愕

奔竄既知孤軍援絕復哨黨圍之數重震仲躍馬奮呼突圍轉戰自辰至酉矢集如蝟北向呼曰臣力竭矣遂沒於陣國朝賜謚烈愍

相希尹蒲州人兵部進士累官甘肅副總兵與賊戰多奇功闕陷蒲州被執瞋目大罵須髯盡張賊怒欲殺之罵益甚時行刑者其舊卒也泣曰吾負公恩奈何尹曰吾爲國死夫何憾但吾髯不可使血污遂銜鬚受刃時知府樊邦正參將張夢鯉皆抗節不屈死州人謂之三忠云

國朝賜謚節愍

姚昌祚臨晉人舉人令新野調沁陽張獻忠兵至城陷手鏃十餘人負傷被執瞋目大罵賊殺之子在紳姪在釣亦從死事聞贈河南按察司僉事賜祭葬一子

國朝賜節愍

景淑範蒲州人官莒州知州有才思慷慨殉城

國朝賜節愍

以上蒲州府

李昱字文昭潞州人性剛烈赴義慷慨宣德乙卯舉人授光祿寺署丞正統己巳額森入寇逆振強駕親征陷於土木昱爲額森所得欲大用之昱曰主辱臣死斯吾致命秋也卒不屈以殉事聞進階徵仕郎贈父母如制錄子瀄爲國子生

王佐字汝弼潞州人舉於鄉正德中爲西平知縣六年流賊攻城佐手殺賊數十人矢斃賊帥賊忿急攻三日佐力屈被執罵不絕口賊懸諸竿殺而支解之贈官賜祭子蔭立祠如典制

朱瑄權潞安人崇禎間以宗貢知陝西秦安縣拊恤窮民以

循聲著委攝伏羌縣未任值寇至督士民守禦城破爲所執繫至伏羌令招守陴者程壤遙謂舊令曰幸固守無降我忍辱至此蓋欲得死所耳言訖回首謂寇何不速殺我遂死伏羌城下伏羌人感其忠相率堅守寇迄不能下

國朝賜謚烈愍

朱迥濤潞安人崇禎間以宗貢知山東鄒平縣遇變殉難藩藩在當時雅稱守禮其以宗貢應者率皆窮經史無聲色狗馬之習及綰綬膺民社如桂陽知州程塢臨胸如縣迥濤胥稱循良而迥濤尤以節顯云

國朝賜謚節愍

朱迥澆瀋府宗室崇禎末宗貢任白水知縣文雅能詩明吏事人不敢欺會賊潛入城城陷猶力戰射賊遂遇害

國朝賜謚烈愍

靳聖居長治人崇禎末授慶陽府推官性廉潔負氣好義見當時臣賊者嚼齒奮罵不少止比闖賊陷關中至慶陽城破死之

國朝賜謚烈愍

申周輔屯留人崇禎間以貢授臨淄縣訓導倜儻有氣節居官日進諸生迪德訓行講論經史尤以器識爲先後遇寇難死之

李養裕黎城人崇禎間爲本郡理廳掾邢紅狼盤據黎之西北養裕以兵備移文授千戶職遂歸鬻產設餉募兵賊逼城下鼓勇登先矢盡力竭被執不屈死城賴保全立祠歲祀以上路安府

賈越石州人正德中以貢授汧陽縣知縣清正有特操遇事立決本境盜起簡鄉勇往勦之不勝遂以身殉

范道行字大衢平遙人九歲能文善詩歌萬曆癸卯舉人授河南澠池知縣立學校重農桑民感其德爲立生祠以魏璫索賄不應被劾歸闖賊之亂索餉甚急道行清不能給罵賊被害

朱新堞家汾州崇禎十四年由宗貢生爲中部知縣公事出土寇陷城免官已而復任時賊入關殺然曰受國恩無以報此吾致命之秋也既受事賊傳檄至怒而碎之人情瓦解屬父老令速去而書表封印使人馳送京冠帶望闕拜又望拜其母卽自經士民葬之社壇側以妻女殉

國朝賜謚節愍

朱致濛號龍澤慶成府鎮國將軍軀幹甚偉好直言傲岸之
氣人多憚之會時事多故敏濛遂放浪不治生理日延名流
暮酒自娛賊據平陽汾人大恐敏濛發困開筭分散貧窶絲
粒無存者賊至徵餉無以應收縛見闔左右使跪敏濛厲聲
曰我將軍也太宗之膝豈爲賊奴屈哉闔令掉下敏濛振聲
一喝齊背披靡退數武羣賊蜂擁爭批其頰罵不絕口折頸
裂毀而死

楊正春字榮初汾陽人補博士弟子賊至爲所執使飲馬他
所正春日吾士人忍爲賊辱哉入孔廟瞻拜痛哭隨投井死
夜見夢於妻曰我得死所矣但水寒沁骨盍早出諸妻號而
起漏竟不得次夜復夢曰我在府學井中何他求也往視果
然正春入廟時有乞兒見之言其狀云

山西通志卷一百三十六 忠烈傳
賈守亨字通吾汾陽人少任俠不羈習騎射賊入其室戟手
大罵與格鬪隨手而倒後賊眾挺亂下守亨給曰汝不過欲
得財耳我有伏藏爲汝探取何得唐突辱我賊諾守亨入授
刃大叫自剖其腹腸出血濺於壁賊驚走

馮運泰字來吉汾陽人爲諸生豪宕自喜善屬文闖賊入晉
運泰拉同儕日夜晝守禦策數上當事乘城之法賊謀知之
方薄城即使使縛運泰以見運泰聞之仰天嘆曰死則死耳
安有昂藏丈夫而受賊刑辱哉遂投井死里人收殮如禮題
曰明殉節處士馮生之柩

李元法石樓人諸生性謹厚學淹經史爲闖賊所執罵不絕
口冒刃而死羣推其義

以上汾州府

賈五會高平人授錦衣衛指揮聞靖難兵南下集鄉兵拒敵

死之家屬悉遭俘戮

段豸字世高澤州人隸籍錦衣衛舉進士正德時官兵科部給事中以劉瑾累謫棗強知縣六年流賊至連戰却之及城陷中四矢一槍瞑目大呼殺賊而死賊遂屠其城豸贈官賜祭予蔭立祠如典制

王徵俊字夢卜陽城人天啟五年進士授韓城知縣崇禎初流賊至禦卻之坐大計謫歸德照磨巡按李日宣疏薦給事中呂黃鍾請用天下必不可少之人亦及徵俊乃量移滕縣知縣累官右參政分守甯前憂歸十七年二月賊陷陽城被執不屈繫之獄士民爭訟其德賊乃釋之抵家北面再拜投纒卒

國朝賜謚節愍

張慶雲字肇興陽城人天啟丁卯舉人殉難贈承直郎宛平縣知縣

張光奎澤州人仕至山東右參政崇禎五年流賊再犯澤州光奎方里居與兄守備光璽千總劉自安等率眾固守八日援兵不至城陷並死之贈光祿卿光璽等贈恤有差

王棐澤州人舉進士崇禎中知蠡縣九年七月以殉難聞國朝賜諡節愍

楊道高平人崇禎十三年進士授渭南知縣歲大凶畢力拯救緝奸人斃於杖民稍獲安十六年十月李自成抵渭南道已擢兵部主事未行圖城守而邑人開門迎賊道被縛索印不予詬罵死

國朝賜諡烈愍

丁泰運字孟尚澤州人崇禎十三年進士除武陟知縣調河內著廉直聲十七年二月朔賊將劉方亮自蒲坂渡河逼懷慶監司以下皆竄泰運獨守南城力不支被執賊擁見方亮使跪不屈燒鐵鎖炙之亦不從乃遇害

國朝賜諡忠烈

張履旋澤州人慎言子舉崇禎十五年鄉試賊陷陽城歎曰吾父決不爲亂臣吾豈爲賊子遂投崖死贈御史

田世福陽城人崇禎時爲宜城訓導十五年冬城陷死之

路如瀛陵川人崇禎中爲臨清州同知十五年閏十一月殉

城以上澤州府

王尙文廣靈人正統丙辰進士授戶部江西司主事額森入寇逆璫王振強駕北征尙文督餉以從土木敗尙文旣脫行

數里復奔還求駕所在聞額森擁之去因慟哭隨之遂及於難後英廟錄死事諸臣贈卹有加子翊以蔭入國學

趙翔大同人少材武有膽略正統中以軍功累升宣府副將扈駕北征至上木額森以鐵騎乘之軍大潰翔奮勇力戰沒於陣英廟復辟贈卹特厚

孫祥大同人正統十年進士由兵科給事中擢右副都御史守備紫金關額森逼關都指揮韓青戰死祥督兵巷戰兵潰被殺言官誤劾祥棄城遁去寇退有司修關得其尸戰地焚瘞之不以聞祥弟祺詣闕言寃詔卹其家

張汝舟渾源人監生正德間由萬泉經歷升順天大城知縣時流賊劉六輩突至汝舟以孤力守危城多方禦防賊大合來攻城陷巷戰而死其子策以護父井遇害事聞贈光祿寺

寺丞蔭一子入監讀書

陳韜大同人正德中任招遠縣丞流賊劉六等奄至城下韜慨然任捍禦事督士民死守越數日外援不至城破被執磔殺之事聞贈登州府通判

李景廣靈人歲貢判高郵州有政績擢知西華縣正德中流賊攻圍甚急景躬環甲胄與民死守力竭城陷賊執景以刃脇之景不屈遂遇害事聞贈光祿寺寺丞錄子延齡入監

林椿字永年大同人幼有孝行嘉靖中襲父職右衛指揮僉事積功晉署指揮僉事歷左副總兵協守大同諳達入總兵張達被圍椿時別擊零騎於彌陀山急引兵西救一日三戰亦陷重圍與達胥歿贈都督同知諡忠勇立祠賜祭葬子鳳騰蔭指揮僉事世襲

栗繼芳大同人嘉靖中敵入寇禦之繼芳以試百戶從至小
鶯圪塔茨林兒獨與敵遇直前與之搏賊斬數十人敵圍之
數重繼芳不少挫戰益力旋沒於陣事聞詔祀勸忠祠中
關山大同人嘉靖中以都指揮使任宣府中路參將敵擁六
萬騎由毛家溝入葛峪勢甚亟山率所部千人奮勇進兵旣
交被圍風霾大作矢攢射如雨山督將士力戰自辰至酉越
次日黎明殺傷幾千餘人遂沒於陣兵部上其狀賜贈卹
王福大同人驍勇通兵略嘉靖中以指揮管千總事二十八
年敵入犯福出哨與遇於曹家莊奮勇徑進斬首五級陷陣
中以死事聞敘恤有加

梁琦應州人萬厯中以世襲指揮使官甯夏遊擊李承恩之
亂琦適以事他出聞變亟返入城將爲討賊計賊黨許朝士

文秀等閉門拒守而縛其家人以脇之琦大怒持刀奪門驅眾入馬蹶爲士文秀所執磔殺之至死罵不絕口事聞贈都督立廟賜額命所司春秋祀之

李橫

一作橫

大同人崇禎初累官遵化中營參將性忠勇每戰

輒先登爲麾下倡二年

大兵入關督所部勤王擐甲橫刀大呼徑進以眾寡不敵陷陣以死後得其尸猶勃勃如生事聞贈都督僉事

國朝賜謚烈愍

安懋修字宏養天城衛人萬曆乙卯舉人甯晉知縣崇禎十一年九月

大兵伐明十月克高陽兵及甯晉懋修率士民固守得完敘功爲畿南保障第一加二級紀錄行取明年正月

大兵自濟南北旋復攻之時畿內山東摧破者七十餘城明師十八萬集晉州不敢進援絕城繼陷懋修死之事聞卹賻

光祿寺少卿

案舊志人物失載故乾隆中賜謚不及

焦埏大同後衛人祖澤父承勳俱總兵官勲勞著嘉隆間埏以世將子喜兵法精騎射以功累官大同副總兵崇禎末大兵及山海關聲勢甚急埏奉命率所部赴援力戰不屈事聞贈卹有加

國朝賜謚烈愍

曹文耀大同人贈都督文詔弟也從兄征討數有功河曲之戰斬獲尤多後以副將擊賊忻州戰死城下詔子贈恤

國朝賜謚烈愍

朱偉山陰人父國賓萬厯中任平魯衛參將勤於訓練營伍

肅然偉沈雄多勇略官洮西副總兵晉延毅總兵崇禎初移鎮關門甲申之變服鴆死

國朝賜謚節愍

吳從義字裕強山陰人崇禎庚辰進士授長安知縣時閭賊蹂楚豫間漸及秦境督師孫傳庭總七省兵駐省會從義出己資供征調費復設法賑貸閭賊入關從撫臬守禦慷慨乘障日夜無倦色城破入關帝廟引刀自刺不死投於井賊至將援以上大罵不止賊怒推石斃之

國朝賜謚節愍

張爾塾大同人丰姿魁岸慷慨有氣節精騎射嫻韜略居家事母以孝稱鄉里爭訟率一言決定人服其公以功升撫標守備崇禎癸未都城戒嚴奉令領健卒五百爲前鋒至蘆溝

橋陡遇兵數千直前搏戰及圍之數重乃下馬步鬪箭不虛發身被重創奮擊愈厲會日暮救援不至顧左右止存二三人乃仰天大呼曰見危授命吾得死所矣遂力戰死事聞贈卹後次子習舉業科甲聯登人以爲忠孝之報

國朝賜謚烈愍

劉永昌安東衛人世襲指揮使歷升江南總兵崇禎間流寇猖獗奉命勒賊鎮守江淮十七年闖賊陷應州執其父令招永昌永昌曰國破父執生不能殺賊惟有一死以報朝廷耳因檢軍冊置案上三鼓投江死後人爲樹碑題曰劉大將軍盡節處

國朝賜謚節愍

馬振麟陽和衛人甯武遊擊闖賊陷城督兵巷戰與周將軍

俱死

國朝賜謚烈愍

張巖字維石陽和衛人宣府參將陣亡

國朝賜謚烈愍

李若葵大同人廩生崇禎十七年閩變與兄象葵弟諸生心葵姪桂周衣冠拜畢題壁曰一門完節偕婦女五口俱縊死

以上大

同府

畢清威遼衛人嘉靖中選貢任浙江慈谿主簿勦倭寇沒於陣贈太僕寺丞蔭一子入監讀書子孫永免二丁仍於地方立祠祭祀

李梅平魯衛人世襲指揮同知中武舉累官陝西延綏參將以古兵法部勒軍士遇敵雙山堡謂其下曰是殆將南牧我

以孤軍與之格亦所以報國也挺刀入敵陣下威感激大呼
乘之梅身集矢如蠅中十餘槍以死事聞贈後府左都督賜
祭葬子子世藝指揮僉事

麻承宗右衛人貴從子爲遼東副總兵天啓初西平破戰死
沙嶺

國朝賜謚烈愍

周繼謨右衛貢生任遼東自在州知州死難

國朝賜謚節愍

郭之麟威遠衛人崇禎間選貢授真甯縣知縣撫士民薄賦
稅以循績著時鬪賊獯獯團練鄉勇教以陣法又設守禦具
賊來擐甲登陴與吏民日夜守卒保孤城後攝咸陽篆遷九
江府監紀同知遇變以身殉子傳芳亦以選貢累官遠州知

州

國朝賜謚節愍

柳毓榮字舍金朔州人父病侍湯藥衣不解帶者三年人稱柳孝子生平仗義扶危崇禎間任朔州衛掌印指揮甲申闖寇犯州境毓榮與城守事捍禦甚力城破被執罵不絕口賊大怒以刀斷其舌然後殺之嘆其忠烈不去口

國朝賜謚烈愍

殷體信字明宇朔州人崇禎間以驍勇起偏裨總鎮固原闖賊入關中郡邑多陷誓死殺以酬主知賊至督將士苦戰沒於陣嗣隴間言戰將者以體信爲第一

國朝賜謚烈愍

張名世字經宇馬邑人以拔貢選授棗強丞遷知白水尋擢

府同知爲督帥經略洪承疇所器重與諸督撫爭題薦請爲監紀參軍升薊州兵備道

大兵壓境左右請出走名世曰吾以身許國義當與城存亡乃率衆固守城陷力戰沒於亂軍中季子啟元死之長子體元仲子調元獲其尸以歸

國朝賜謚烈愍

史朝顯朔州人世襲副千戶闖逆陷城脅之從顯大罵不屈死一門遇害惟十二歲幼子成得免

國朝任浙江甯台總兵贈榮祿大夫

以上朔平府

邱陞鎮西衛人父麟衛指揮正德中戰沒無忠名陞慷慨負氣節襲父職嘉靖間遷北樓口遊擊倭寇犯江南簡邊陲將征之陞與焉率水陸衆並進屢戰皆捷獲賊千餘人以功擢

揚州參將凱還過叢林遺孽數十人猝出邀其歸路陞橫刀
躍馬徑前薄之賊黨驚潰陞亦中流矢死總督胡宗憲爲文
以祭海防道劉景韶哭以詩事聞贈都督命立廟如皋以祀
蔭子世襲衛指揮

李聯芳鎮西衛人幼失怙庶母郭氏撫之長襲世職爲指揮
遷大同得勝堡參將擢陝西洮州副將甫至沙巴山敵入犯
麾下裨佐見敵勢猖獗皆遁芳獨進陷陣先登救援不繼歿
於陣贈都督同知今與邱麟父子同祀五寨城北之忠義祠
賈三光字孟明偏關廩生客甯武周鎮軍所闖賊圍城周贈
以金促行三光曰公爲君死吾甯不爲公死乎城陷自盡

甯武府

張煥榆社人洪武庚午舉人永樂間任安邱知縣時值唐賽

兒妖術惑人寇掠郡邑輿率兵督戰不利一日輿上城觀之見白旗下妖氣曰白色者西方金也可用火攻遂扯衫帶塗燭油縛箭上燃之箭中旗果焚妖氣遂散乘勝大破之事聞陞山東左參議後值海寇爲亂輿又以計平之尋沒於陣上嘉其忠旌表東人立廟祀之

張友程遼州人萬曆己酉舉人授刑部主事流寇陷城被執其子廷揆哭隨友程厲聲曰我去死耳汝隨我何爲及見賊首叱之跪友程曰吾勝豈爲賊屈賊怒殺之

侯標遼州人崇禎庚午舉人流賊陷城官軍圍之賊誘以書云兵退免其死標曰恨不殺汝耳身命何足惜遂遇害父於畿廩生弟楷樞皆死之巡道馬之陞表其節義

楊于楷遼州人崇禎時爲行人五年紫金梁等寇遼州于楷

方里居與主事張友程佐知州李呈章拒守力屈城陷于楮被執罵賊死友程及舉人趙一亨侯標並死之贈光祿少鄉國朝賜謚節愍

樂濟眾和順人崇禎時累官昌平副使六年六月賊陷和順濟眾方里居被傷不屈投井死贈太僕少卿

國朝賜謚節愍

劉啟先遼州人孝友素著流寇逼城預囑妾女整衣手鐙以待城陷呼曰隨我來至城隍廟并曰此爾等死地也妾王抱三歲女並女二姐投井死啟先與姪諸生永祚爲賊執繫至常金麟家啟先厲聲罵賊永祚與麟父子各奪賊棍擊傷數賊賊遂蜂擁亂斫死

王心正遼州人諸生流寇陷城妻憲媳李女大姐俱投井死

賊怒遂殺心正正子干總身極奮持大刀殺傷數賊力竭而

死

以上遵州

宋訥沁源人由貢士官大名府知府靖難兵起死之

魏祥沁源人任萬泉都司指揮使累官京營參將正統間力戰而死

楊復楚沁州所副千戶嘉靖間剿綿山土賊楊甫等被賊火焚死州人立祠祀之奉旨加一級襲正千戶

魏令望字于野武鄉人崇禎中舉進士授商邱知縣調太康十四年二月賊至固守不下賊怒攻破之屠其城令望闔門自焚死

國朝賜謚忠烈

張運亨沁州所正千戶崇禎間調征河曲流賊力戰死事聞

贈指揮同知子孫世襲

魏都梁沁州副千戶原任協鎮直隸通津等處地方副總兵在籍崇禎五年流寇逼境都梁力戰死事聞贈榮祿大夫都督同知子襲升指揮僉事

國朝賜謚烈愍

姚啟崇沁源人崇禎中爲蒲城縣丞賊至佐知州朱一統守城不屈死

魏崧沁州人官西安白水教諭崇禎間闖賊陷城衣冠自縊死

時睽沁州人由千戶官至利民參將罷歸流寇犯沁拒敵陣亡贈指揮僉事

國朝賜謚烈愍

左冲霄沁州人隨父永清奉新縣丞署華林賊起從征擒殺賊首陳九安九珠等廿餘人賊結陣進攻奮勇破之父得免又與妹夫劉玉深入賊巢力竭被執不屈死事聞封忠勇將軍令有司歲時致祀

張輔官沁州人陵縣知縣山東寇亂抗節不屈公服坐庭爲賊所害

國朝賜謚節愍

魏以繼武鄉人諸生應省試母喪慟哭奔歸時寇亂所親力阻其行不得曰母死不歸禽獸也卽不幸死賊手猶得免于禽獸至陰延果被執大罵不屈死

以上沁州

石撰平定人以學行稱洪武中薦爲甯王左長史燕王舉兵撰在大甯輒爲守禦計每以臣節諷王王亦心敬之及燕兵

龔大甯執撰憤詈不屈遂支解死

國朝賜諡節愍

郭浩孟人正統間以貢授工部主事土木之變被執不屈死
事聞贈員外郎蔭子思聰爲國子生後官鉅鹿主簿

韓能孟人正統間官隨駕將軍駐蹕土木能手執金瓜奮勇
力戰死之

賈琮嘉陽人博洽羣書工文藝癸卯舉人授都督府經歷從
英宗北征死於土木之難贈奉直大夫協正庶尹

趙紱樂平人生而沈敏萬曆丁酉舉於鄉甲辰登進士授盧
龍令選南京陝西道御史升通政司官至兵部尙書爲人孤
耿峭直不阿權貴還里遇寇罵賊不屈死

趙國鼎樂平人鄉試第一崇禎七年進士知寶坻縣九年七

月殉城贈卹如制

國朝賜謚節愍

葛疑秀平定人崇禎甲戌進士授行人司行人遷戶部郎中請告歸疑秀忠孝有至性居父母喪前後廬墓凡六年甲申聞變北向再拜大哭數日投繯死

朱一統平定人舉於鄉崇禎中爲蒲城知縣十六年十月西安屬邑迎賊獨謀拒守曰吾家七世衣冠安可臣賊或言甲榜多納款一統曰此事甯論資格耶以體肥令家人擴井口以待會衛兵叛奪印趣迎降一統瞋目叱曰吾一日未死印不可得日暮左右盡散從容赴井死

國朝賜謚烈愍

安邦輔平定人州弟子員幼負奇節闖逆之亂守土諸臣率

賈降封疆大吏亦多擁兵自衛邦輔皆裂髮指恨不一當賊
鋒比闖逆敗歸過平定邦輔偕友陳一忠徑詣賊營痛詆之
且曰不意祖宗二百七十餘年天下遂壞汝手因投井死邦
輔一書生朝不坐宴不與國亡不自晦匿卒以身殉亦可以
媿爲人臣而懷二心者矣

以上平定州

喬份定襄人正德中以材武授百夫長會賊起東山份率衆
勦之抵賊巢賊出不意幾驚潰已知爲孤軍無後援悉衆拒
之份瞋目橫刀所向披靡力竭遇害事聞朝廷嘉其忠烈命
子孫世襲其職

喬遷高字元柱定襄人以貢生授永平通判遷鞏昌同知就
擢知府屢平土寇勞績甚著遷按察司僉事尋命監督師孫
傳庭軍傳庭之再出關也天大雨糧不至士馬多餓遷高繪

己像遣人持以乞糧題詩其上有我身不及沿門跪故遣丹青繪我顏之句聞者悲之及師敗遷高從傳庭圖守關賊至躍馬陷陣手刃數賊力竭伏劍死

國朝賜諡烈愍

張宏業字印吾忻州人光祿卿泮子天啟間任撫標都司崇禎甲申闖寇犯太原時年七十餘歲矣協守阜城門勇悍如少年賊鋒近或勸宜少引避不答事迫妻趙相向涕泣宏業意自若亟呼僮奴具晨飯飯已啟櫃裏一繩以出立城頭矢石間指畫方略比破人悉奔潰從容下入邏室中命壻某結繩梁問某懼甚手顫不能舉宏業笑曰孺子幾悞吾事叱之去問戶解佩刀引頸就繩以死是日趙亦自縊子凝和嘗官順天府通判分守北城亦死同時前衛指揮韓似雍千戶司

鼎俱以協守殉

國朝賜宏業謚節愍

郝芳聲忻州人舉進士崇禎中知滋陽縣有治聲十五年閏

十一月殉城獲贈卹

國朝賜謚節愍

高象觀定襄人殉難監軍道遷高子也邑弟子員甲申闖賊破縣城以宦裔嚴追餉不少沮縮已復解往陝西至黃土寨謂妻史氏曰吾忠臣子不可爲不義屈逐逐道途間吾欲一死以下從吾父史曰吾意亦爾遂夫婦對縊死當時論者謂父死於國子死於父婦死於夫一門節義尤焯著三晉而明史遷高僅附孫傳庭傳頗略云

范襄忻州人崇禎初流寇自河曲至率衆悍禦爲賊所刺洞

腹而死知州張珩爲刻碑銘稱曰義愍

趙徵庸忻州人武生饒膽略多技勇崇禎四年寇聚草梁山徵庸偵知請于當事率鄉兵五十人往勦挺身當先直搗其巢賊望風竄徵庸下山忽馬被石蹶爲賊所乘遂死州人哀之

以上忻州

王源五臺人宏治十二年進士正德中爲川北僉事六年正月行部會賊藍廷瑞鄧本恕等掠迺巴至營山源率典史鄧俊禦之皆爲所殺贈副使蔭子

孫璽字廷信代州人舉於鄉連知諸城扶風縣正德六年都御史藍章以略陽漢中要地舊無城而其令嚴順懦不足任檄璽往城之七年正月功未畢而川賊至順欲去璽拔刀砍坐几曰欲去者視此乃率僚屬堅守數日城陷璽被執大罵

不屈賊脅殺之順逃去誣璽俱逃溺於江以他人尸斂璽子啟視非是訟於朝勘得死節狀贈光祿少卿賜祭予蔭抵順罪

安瑄五臺人正德間由例貢授夏邑縣丞流賊劉六等焚掠縣境瑄與守城事城破爲賊所獲以身殉事間贈開封府同知錄子節爲國子生河南忠臣錄有贊

崔賢代州人舉于鄉崇禎中知新河縣九年七月大兵至殉難

國朝賜諡節愍

高斗垣繁峙人崇禎十二年由恩貢生授西平知縣爲人孤鯁以清慎得民城陷被執不屈死

國朝賜諡節愍

張令閻弟令名代州人俱諸生祖貞由貢生任曲沃訓導父本順亦貢生甲申二月賊陷太原遣將狗代令名謂令閻曰時勢如此招忠義以遇賊衝力不能也反面事賊吾不忍自古甯有不死之人哉令閻曰恐遲則不得爲明朝鬼矣具衣冠泣拜孔廟中指明倫二字以止勸者歸卽哭拜其母曰兒等不敢偷生以玷先人惟是不能終養爲不孝有長兄令德季弟令譽在幸勿爲兒痛也置藥酒中弟兄飲畢長吟曰勁草疾風知大節貞松寒歲識冰心遂卒賊聞之曰義士也相戒勿犯其家

以上代州

徐堯臣保德人嘉靖間以百戶統軍於唐家會擊冰敵衆踏冰入犯堯臣拒堵力戰面中五矢刀傷七處沒於陣事聞恤錄加副千戶

戴辰所千戶嘉靖三十七年寇圍豐阜城奉檄往援語妻趙曰後事畀爾謹奉舅撫孤轉戰重圍身中一十七創力竭而死寇亦解去事聞贈明威將軍指揮僉事

徐棟保德人官至老營副總兵隆慶四年陣亡贈都督指揮僉事

韓文范字一威保德人領萬厯戊午鄉薦令鹿邑守慶陽累以禦寇功升神木道副使城陷夜以金簪自刺不死尋罵賊遇害

姜名武字我揚保德州人舉天啟二年武會試授大同威遠守備崇禎初遷大水峪游擊築杏山城遷宣府西城參將擊斬大盜王科移守宣府右衛擢通州副總兵護諸陵以故官典保定總督楊文岳中軍兼忠勇營團練事十五年從文岳

山西通志卷一百三十一 忠烈金一 三十一
往援開封左良玉軍潰諸營悉奔獨名武一軍堅壁不動侵晨賊大至督麾下血戰殺數百人力竭被執大罵爲賊磔死贈特進榮祿大夫右都督蔭外衛世襲總旗十七年其子援王來聘甄奇傑例乃議贈特進光祿大夫左都督世蔭錦衣百戶而部議上不果行

國朝賜謚忠烈

高日晷字翼皇保德人崇禎中兵部進士官甯武關遊擊闖賊陷城同總兵周遇吉死之

國朝賜謚烈愍

常道行字昭五保德州諸生工制藝兩擬省元不售以貢授黑水監正闖寇陷城死之

楊子階字翼極保德人崇禎中歲貢令河南濟源縣亦死闖

雜

國朝賜謚節愍

楊應璧河曲人諸生流賊王嘉印亂率眾擊之面中一矢爲賊所逼墜城死

郭邦莫郭磐並保德人崇禎間奮勇同謀欲殺賊首王嘉印事泄被殺知州王國珪嘉之爲繪二像於廟壁

苗根千河曲人驚炭爲業流賊據河曲聲言官兵殺良冒功民懼不敢出根千陰藏制府諭帖徧散城中民始歸正賊覺欲殺之根千大呼曰軍門有諭出城者活在城者死汝等速去賊折其首又趙調元從巡撫宋統殷復縣城亦被賊害

以上保德州

姚汝明夏縣人天啟元年舉於鄉性孝友崇禎間歲大歉傾

廩賑濟立義冢瘞暴骸授蠶縣知縣歲饑惠政甚備聞鄉邑
又饑貽書其子令賑救如初遷河間府同知十五年閏十月
借妾任氏殉城贈僉事

國朝賜謚節愍

王國訓字振之解州人天啟二年進士歷知金鄉壽張滋陽
武清俱有惠政崇禎四年坐大計免久之補調扶風國訓性
剛嚴恥干進故官久不遷八年秋賊來犯嬰城固守閱兩月
外援不至城陷罵賊死贈光祿少卿賜祭葬蔭一子入監

國朝賜謚節愍

李恪安邑人僉事圭孫也生有異質博極羣書詩學字韻尤
稱專家崇禎甲戌進士累官山東僉事備兵兗西受命後見
國事日非慷慨自誓卒以身殉

靳斗安邑人歲貢官山東陽信教諭崇禎癸未城陷罵賊不屈死孫麟衍麟振赴井死僕薛國興張引自刎死合門殉難凡九人斗子儀靈諸生號泣奔喪覓尸負歸

盧學古夏縣人舉於鄉授衡水知縣遷承天府同知攝荆門州事崇禎十五年十二月李自成寇荆門學古誓死守賊環攻四日無援城陷學古罵賊不絕口剖腹而死

國朝賜諡烈愍

李康舊志芮城人由舉人令任縣城陷死之

國朝賜諡節愍

陳懔芮城人恩貢任景州判遷東城兵馬司逆闖陷京師死之

侯佐字東俾解人崇禎間進士任建平合肥令俱有能聲擢

刑曹轉吏曹以公恕聞在籍遭亂急父難死之祀鄉賢

以上
麟州

申儒垣曲人貢生官寶慶經歷宏治間朱天章亂偕子逐之舟至洞庭遇伏被執不屈死當道爲立祠以祀焉

陳韜絳州人萊陽丞正德間流寇攻城與子死之事聞贈登州府通判卹蔭如例

翟夢標字懷玉聞喜人天啟間貢厚重美髭髯讀書過目不忘爲文雄麗雅量過人雖有犯者誣者若罔聞知兼精脈理凡有求者無富貴貧賤咸親爲診視施方藥活人無算終遭閹變不屈而死並無後邑人惜之

趙輝字黃如河津人崇禎七年進士授戶部主事兩督倉儲力祛姦蠹歷兵部郎中遷霸州兵備副使十五年十一月整冠帶殉難子琬同死贈光祿卿

國朝賜謚節愍

康四維絳縣人有勇略燕領虎頸崇禎甲戌武進士授陽和守備擢山西都司僉事再擢廣西掌印都司賊抵城下四維督兵登陴悉力捍禦久之糧盡城陷賊入四維奮臂巷戰與其妻子俱殲焉

國朝賜謚烈愍

暢一鵬河津人天性孝友崇禎九年舉于鄉爲尉氏知縣甫數月政聲四起城破罵賊死

國朝賜謚節愍

吳繼武稷山人崇禎十四年以武進士任陝西榆林都司忠勇有謀略練兵足餉思鵲起爲國家當一面軍士咸奮躍恐後後二年闖賊入關中榆林邊塞重地多將家子尤爲所虎

視繼武與道臣都任鄉官尤世祿誓竭力守掣賊使不得東渡賊并力攻踰七日城陷繼武巷戰以死任與世祿亦俱戰沒

國朝賜諡烈愍

柴孟冬垣曲人諸生崇禎庚午賊陷村堡與子寅忠同日戰死又有諸生黃時度王有光張體素史官盧如棟任大觀鄉民柴阜棟張永林原養重馬世武史國顯等皆被傷不屈死盧繼芳絳縣貢生流賊犯晉督鄉兵往禦死之又有郭帝都諸生亦以禦賊被執不屈死

撤君錫字賓王絳州人爲諸生有聲從遊者甚衆崇禎中爲荊州府訓導十五年十二月李自成向荊州監司以下皆奔君錫正衣冠端坐明倫堂賊至欲屈之詬罵而死

朱東屏宗室子家絳州崇禎間闖賊陷城投繯死凡上遺書曰天下皇皇愧無一長君恩未報親恩難忘惟有一死以正綱常子養沖養志亦繼死

文襄絳州人夫妻以孝聞崇禎間京城失守痛哭成疾闖賊陷城自刎于家廟賊聞相戒不入其室四日始斂顏色如生又張金鉉歲貢文新命張治光俱思貢亦死難

以上絳州

安民字熙寰大甯人生有至性養母凡朝夕膳以意揣輒先得其心母病便溺悉手自浣濯居鄉醇謹有古君子稱崇禎初以貢授襄城知縣號廉平吏六年寇至與城守事城破被執不屈死民規言矩行素恭謹一旦臨事變從容就義人尤難之

史光代字射墟臨州人幼英敏以績學著崇禎間膺選貢授

上蔡縣主簿遷日照縣知縣再遷鄖陽府通判攝府篆正身率屬三年告歸遇寇變以鄉先生任守禦責城破死之兄光前萬厯中捐粟千石賑饑與光代同日盡節

李善永和人貢生流寇至大罵力戰死子世隆世奇蒙難復駐追賊至臨汾擒之詔旌其義

呂大成字宗韶隰州諸生闖賊陷城投井死同時死者有李愈秀字誠所亦諸生又有王家棟宋希唐暨子永隆同戰死

以上隰州

賈維新趙城人洪武間貢生授兵部主事歷戶部郎中大理寺卿性忠諷有氣節不肯爲不義居官以公勤廉幹著靖難兵至不屈死之

李梅霍州人嘉靖間率鄉民禦東山賊被創不屈死又劉文

英土寇破堡鴈不絕聲死子澤方聞難執刀追之賊爲辟易
翟公佑靈石人爲省祭官與弟公忠友愛深至嘉靖壬寅土
寇猝至執之兄弟爭死遂俱遇害

宋之儔靈石人天啟壬戌進士崇禎中歷官登萊監軍副使
忤巡按謝三賓互訐落職歸十七年邑破不屈受刑死妻喬
晉賊撞階死女斂尸畢投簪刺喉死

國朝賜諡節愍

以上
霍州

右明一百八十七人

又七十五
人附見

補遺

裴之橫河東人歸元帝位廷尉卿河東內史隨王僧辨拒退
侯景遷東徐州刺史封豫甯侯又隨僧辨破景入守臺城又
隨討陸納于湘州斬納將李賢明平之又破武陵王於峽口

還除吳興太守齊攻東關爲徐州刺史都督衆軍出守蕪城
之橫營壘未周而齊軍大至兵盡矢窮沒於陣贈司空諡曰
忠壯子鳳寶嗣

裴畿之高子太子右衛率力戰江陵死之

以上並梁書列傳

溫廷皓祁人廷筠弟咸通中署徐州觀察使崔彥曾幕府龐
勛之變以刃脅廷皓使爲表求節度使廷皓給曰表聞天子
當爲公信宿思之勛喜歸與妻子訣明日復見勛索表倨答
曰我豈以筆硯事汝邪其速殺我勛熟視笑曰儒生有膽邪
吾動衆百萬無一人操檄乎囚之更使周重草表彥曾遇害
廷皓亦死贈兵部郎中

薛齊寶鼎人右補闕內供奉膺之子河東郡公萃之孫佐興
元李絳幕府絳遇害齊因死之

裴諒度子有文藉蔭累官考功員外郎宣宗訪元和宰相子
思度勳望待諒有加爲翰林學士累遷工部侍郎加承旨後
爲太子少師封河東郡公黃巢迫僞官不從遇害以上並唐書列傳
王貴并州太原人廣順初補衛士宋初累遷散員都指揮使
馬步軍都軍頭領勝州刺史太平興國二年爲淄州刺史從
潘美北征攻沁州立戰功及從楊業射殺遼兵數十人矢盡
張空券又擊殺數人遂遇害年七十三擢其子文晟供奉官
文昱殿直

王審鈞全斌子由崇儀使領富州刺史爲廣州兵馬鈐轄轉
承興軍駐泊都監以擊賊死弟審銳供奉官閤門祇候

王奇汾州人武舉中第章惇經營湖北溪洞以爲將領將其
酋舒光貴縛元猛平懿洽等州累遷如京副使爲湖南都監

徙廣西宜州蠻寇邊奇至天河縣期旦日會戰裨將費萬夜以衆竊出河泥隘戰沒後數日蠻萬人驟集奇輕出遂敗麾下猶數百人勸策馬逃去奇罵曰大丈夫當盡節以報國何走爲遂戰死詔贈皇城使忠州防禦使官其家六人仍賜金帛

以上並宋史列傳

南仲倚氏人有孝行以孝廉稱元兵至先士卒死之

張巖起字傅霖汾州人金末爲國子助教免歸盜陷汾州巖起與妻赴井死

以上金人並見舊志

秦憲字子令曲沃人年弱冠勇略軼倫時妖術陳倉自秦渡河依阻紫金山寇掠村落憲招鄉勇百餘夜劫營擒倉餘黨潰散金顏脫木耳與巴哈兵犯遼界晉募兵東征憲應募大戰敵懼請降後苗民叛復詔憲征之憲單騎直衝苗營斬首

數十卒死於戰

野峻台大同人父趙世延見鄉賢嘗爲四川行省參政與平章咬住分領銳卒八百爲前驅拔巴東縣平歸峽等州又進拔枝江松滋二縣乘勝趨江陵戰清水門中飛槍遂死事聞追封涼國公諡忠壯弟伯忽夔州路總管亦戰死蜀中追封蜀郡公諡忠愍

王得貞霍州人進士元至大間懷慶路總管能詩善草書至正間爲賊兵所執不屈死贈河東宣慰司使

以上元人見各府州縣志

胡曰藩交城人明崇禎初省祭官七年交山寇倡亂官兵搜捕曰藩餉師入山賊驟至持刀拒門力竭死之邑令王親視葬祭厚恤其家

郭應泰文水人明季以鄖陽照磨署竹谿知縣闖賊至焚其

山陰通志卷一百三十六 忠烈列傳上 四三
偽檄竭力守禦城陷投壕死

王希鴻字后槐官閩縣主簿署福清知縣有政聲告歸值土寇竄起圍其居劫之希鴻大罵墜樓死又諸生鄭從周縣人張翼明並以罵賊不屈殉逆闔之難

柴良襄陵人正統丁卯舉人授廣安知州寇至州治左右請避之良不可獨懷印坐中堂竟遇害州人哀慕立祠祀焉王爾揚懷仁人代府儀賓博學工書翰尤慷慨好義嘗讓田產焚借券建坊旌獎崇禎間闔賊寇境謂郡王曰恨不能戮力破賊義不可辱遂相對投繯死

黑能原任大同軍旗屢立戰功歷升指揮僉事調任甯夏安邊營天順間北兵深入衆皆披靡能奮勇爭先力戰陣亡事聞贈指揮同知子黑鑑襲能職後調平魯衛遂入籍子孫蕃

衍

門第新偏關人以貢官湖廣永明令闖賊破城被執奮臂抽其冠簪刺鼻而死賊殘其尸

王彬絳縣人由永樂丙戌進士任興濟知縣時運河衝決城郭漂搖久難修築彬瀟河嘆曰天欲溺吾民何如溺我卽投於河有門役挽帶隨之越明日漂尸於縣堂冠帶如生濟民感之爲立祠歲時祭禱焉

伍維清絳縣人崇禎間以貢授永甯訓導流寇至城破維清罵賊不屈因遇害祀永甯名宦同時廩生郭帝都者以行義見重鄉里流寇竄起蹂躪及絳帝都督鄉兵禦之被害

張斗宸字薇垣歲貢生馮三旌諸生胥大甯人崇禎壬申闖寇陷城俱死之

以上明人並見各志

山西通志卷一百三十六